

## INDUSTRIES DEPARTMENT ARSI LIANTE - 2

*Lalzabiaka,  
Deputy Director of Industries (Retired)*

### **Pu R. Lalchungnunga B.A (L)**

Pu R. Lalchungnunga hi Pu Chalzawna (Taisena) (L) leh Pi Lalngeni (L) te fa niin, February 14, 1932-ah Lunglawn, Lungleiah a lo piang a ni.

Primary School chu Lunglawnah kalin, Middle School chu Serkawnah a kal leh a, Class VII leh Class VIII chu Lunglei High School-ah kalin, Class IX leh Class X chu Maukhar Christian High School, Shillong-ah chhonzawmin, he school a\ang hian Matric a pass chhuak a.College pawh St. Anthony's College-ah kalin heta \ang hian B.A. pawh a pass chhuak a ni.

June 1, 1960-ah Extension Officer (Industries)-ah lutin Lawngtlai Community Development Block-ah a awm a. Lunglei Multipurpose Community Development Block-ah te, Serchhip Multipurpose Community Development Block-ah te a awm leh a. Rural Industries Project, Aizawlah a rawn awm leh a. A.D.C, Tlabungah sawn leh a ni a. May, 1973-ah Superintendent of Industries-ah kaisangin Lungleiah dah a ni leh a. Rambuai lai khan October, 1969 a\angin Khawilailung Grouping Centre-ah Administrative Officer-in awmtir a ni leh a, kum 4 vel zet a awm. Department-a a rawn let leh hnu-ah Rural Industries Project, Aizawlah bawk Planning-cum-Survey Officer hna chelhtir leh a ni a. Rural Industries Project ni \hin kha District Industries Centre-a hlankai a lo nih hnu-ah ani pawh Deputy Manager-ah kaisangin D.I.C., Aizawlah a awm zui leh a. Functional Manager-ah a kaisang leh a. April 25, 1989 a\anga July 11, 1991 thleng General Manager charge a la a, General Manager puitlingah kaisang leh in May 21, 1992 a\angin superannuation pension-a a chhuah December 31, 1994 thlengin a thawk a ni.

Ani hi a vanglai huna Hockey khêl thiam hmingthang tak a ni. Shillonga college a kal lai pawha Assam aiawha khêl \hin a ni a. Khawvel huap pawha hockey thiam lar Dhyhan Chand-a hova zirna (coaching) nei pha ngat a ni a, vawi khat phei chu inkhel tura an inthah \umin a thai khalh hman nghe nghe, mi dang tuma theih loh a ni. Hockey mai ni lovin Football pawh a thiam a, Badminton pawh a thiam a, Shotput, Long jump, High jump leh 100 metre, 200 metre, 500 metre Race-ah te pawh 1st. Prize dawng zak zak thei a ni. A awmna apiangah Sports lam, a bikin Hockey leh Badminton lamah hma lain a awmna khuaa mite zirtir leh chawikangtu a ni zel.

Rambuai laia Khawilailung A.O a nih lai pawhin, hmasawna tam tak a siam a. Rambuai boruak hnuai mipuiin sipai kan hlauh em em lai pawhin, a thlawna sipai hnena thing leh tui an pek a titawp a, mipui thlavang hauhin sipai a hnek let tawp ngam a ni.

Kohhran lamah pawh \hahnemngai tak, a theih china rawngbawlina chanvo pawimawh tak tak chelh \hin a ni a. Ramhlun North-a Baptist Kohhran dintu leh Kohhran Khaipa a ni.

March 30, 2019 zîng dâr 3:08-ah chatuan ram min lo pansan ta a ni. (A chanchin hi a dam laia buatsaih \an niin amah ngei pawh ka kâwm kha a ni a, chhuah a nih hmain chatuan ram min lo pansan ta mai hi ka tân chuan a hrilhhaithlak khawp mai)

**Pu C. Ngunchunga B.A (Hons)**

Pu C. Ngunchunga hi South Lungpher (Bualpui NG piah)ah kum 1938 khan a lo piang a. A pa chu Zakhama Chinzah niin ,a nu chu Dang\iali Fanchun a ni.

Primary School chu Lungpherah kalin, Middle School chu Bualpui NG-ah a kal thung a, High School Class VII leh Class VIII chu Saihaah, Class IX leh X chu Lungleiah a kal thung a, College chu St. Edmund’s College, Shillong-ah kalin heta \ang hian a Graduate a ni.

Shillong-a lehkha a zir lai pawh hian office pathumah a thawk hman a, a hlawhin a inchâwm a ni.

Hriat theih chinah Superintendent of Industries-in 1971-ah a lut a, Saiha leh Lungleiah a awm a. Deputy Director of Industries, Aizawlah (01.07.87 - 21.04.89) awm lehin, General Manager, DIC, Lunglei (22.11.89 - 20.02.92 leh 01.04.93 - 04.01.95) General Manager, DIC, Aizawl (31.12.94 - 17.05.2000). Joint Director of Industries-ah kaisang lehin 15.05.2000 - 28.02.03 thleng a awm leh a February 28, 2003 khan superannuation pension-in a chhuak ta a ni.

Motor khalh a thiam hle a, ramvah ngaina leh nuam ti tak a ni. Tin, khâwlchhut (typing) a thiamin a rang (speed a sâng) hle a, Typist tam takin an tluk lo. A thil duh uluk deuh chu amahin a chhu mai \hin. A khâwl chhut thiam hi Shillong-a College a kal laia office pathum ngawta hna a hmuh theih chhan pakhat a ni ngeiin a rinawm.

Amah hi la damin, vanduaithlak takin ‘Alzheimer’ natnain a tlakbuak ve tlat mai a. A chanchin kimchang hriat theih a ni ta lo va, a nupui Pi Sithangi leh a u (a u, u leh) a\ang leh office-a ‘Incumbent Board’ a\anga khawn khâwm a ni e.

**Pu Joy Dev Sen, Dip. in Mech Engg**

Pu J.D. Sen hi January 1, 1947-ah thingtlâng khaw pakhat, tâna Bangladesh lama bet taa piang a ni a. A pa chu Jogasundar Sen niin, a nu chu Nirmala Sundari Sen a ni.

Primary leh Middle School chu Cachar District-a thingpui huan hmunah a kal a. High School chu Hailakandi-ah kalin chuta \ang chuan Matric a pass chhuak a. B. Sc pawh 2<sup>nd</sup> year thleng a zir hman a, mahse, Polytechnic lamah pênсанin Diploma in Mechanical Engineering a zir chhuak ta thung a.

Dip. in Mech. Engg. a zawh hnu hian private industry hnuaiiah Engineer hna kum 1974 thleng a thawk phawt a. Kum 1975-ah West Bengal sawrkâr hnuaiiah Directorate of Cottage & Small Scale Industries-ah Extension Officer (Technical) hna, Mizorama a rawn thawh hma zawng chu a thawk chhonzawm leh a.

Kum 1978 May thlaah Mizoramah Directorate of Industries-ah Technical Officer hna a rawn thawk \an a. Project Manager (Infrastructure) te pawh a han ni leh a. Planning lam kha a thawk tam a. A pawimawhna leh \ûlna hriain, Pu H.V. Lalringa IAS khan Secretary, Industries Department leh Director nih a kawp lai khan Deputy Director of Industries (Planning & Monitoring) post hi Non-Plan hnuai a siamtir a. Pu J.D. Sen hian chu post chu a luah nghal a ni.

Kaisâng leh in District Industries Centre, Lungleiah January 5, 1995 a\anga September 26, 1996 thlang General Manager a va ni leh a. Chumi hnu October 11, 1996 a\anga voluntary retirement-a a chhuah thlengin Joint Director of Industries hna a thawk leh a ni.

Pa taima leh hna thiam tak a ni a. Project a siam a, a ruahman angin, Hindustan Machine Tools Ltd. (HMT) nena \angkawpin, a hun laia khâwl \ha leh changkâng tak tak bunin, Rural Industries Development Centre (RIDC) saw din a lo ni ta a ni.

Directorate-a a awm lai hian Director te thachhangdâwl a ni tak meuh a, budget/financial control-ah pawh inngahna leh rinrâwl a ni.

Homoepathy damdawi lam pawh a thiam a, mi ràwn a hlawh viau \hin.

January, 2000 a\ang khan voluntary retirement-in min chhuahsan ta a ni. A uiawm khawp mai.

### **Pu B.S. Chhetry B.A. (L)**

Pu Siana tia kan hriat lâ ber a ni a. A hming pum chu Bir Singh Chhetry a ni. Kum 1931, April ni 21-ah Rahsi veng, Lungleiah a lo piang a. A nu leh a pate chu Kul Bahadur Chhetry (L) leh Kunti Devi Chhetry (L) te an ni. A têt laiin 'Sinu' tia koh \hin a ni a, Mizovin 'Te-a' kan tih ang hi a ni a, a hnu-ah 'Siana' tia koh/sawi zui a ni ta a ni.

Zirna lamah chuan Primary leh Middle School chu Lungleiah kalin, High School chu Rangamati (tuna Bangladesh ni ta)ah a kal thung. College chu Shillongah a kal.

A Graduate hnu hian Shillongah, Assam Regiment-ah kum 1952 a\angin kum 3 vel Sipai Clerk-ah a \ang ve hman a.

Industries Department-a a luh \an leh a kaisân chhoh zêl dàn chiang taka hriat vek theih chu a ni tawh lo a. Hriat theih chinah Extension Officer-a bul \anin, Lunglei leh Saihaah te a awm phawt a. Industrial Promotion Officer-ah, Asst. Director of Cottage Industries (office hrang neiin), Deputy Manager/Functional Manager, Deputy Director of Industries (17.10.85 - 05.04.89), General Manager, District Industries Centre, Aizawl ( 12.07.91 - 31.12.91) te pawh a ni chho zel a. A thawh dàn leh awmnate chiang taka hriat vek theih a ni ta lo va. December 31, 1993 khan Superannuation pension-in a chhuak ta a.

Pi leh pu a\anga Mizorama lo awm tawh, Mizorama piang leh seilian a ni bawk a, Mizo \awng chu a pianpui \awng tluk zet in a thiam a, keini leh tûnlai \halai tam tak ai hian \awng kauchheh leh \awng upa a hria/thiam tak zâwk daih hial ang. Motor khalh a thiam hle a, a 'part' leh an thawh dân pawh a hre hle. 1980/81 vêl khân, keini, E.O leh E.I-ho kha motor (khatih lai chuan Jeep a ni ber) kha a 'part' hrang hrangte min hrilh a, Rural Service Workshop (RSW), tuna Rural Industries Development Centre (RIDC) ni taa khâwl hrang hrang awm te kha a chanchin min hrilh hlawm a ni.

A 'retire' hnu hian Kathmandu lamah a awm tam ta a. October 27, 2016 khân chatuan ram min lo pansan ta a ni.

*Industries Department lo kaihruai hmasatute hi an chhuanawm tak zet a, Department Arsi Lian nih an tling tak zet ka ti a, keini, an hnungzuitute hian kan tluk lo hle mai. A la thawk lai mêk \henkhat pheih hi chu hre chiang hman lo pawh kan awm nualin ka ring. An chanchin hi thâm ral mai atân chuan ka ui êm a ni. Mi dang pawh an chanchin chhinchhiah tlâk tak tak pawh an la awm thei e. Ka hriat theih chin te an ni a, mi dangin an chhunzawm tûrin ka dah ta mai e.*

Industry Meichher  
Apr-Jun, 2019